


## Casti Lagenberg

Il num Lagenberg vegn mess en connex cun ils lags en siu contuorn e da quels deriva era il num Laax («lages» dal latin lacus = lag). Mintgaton san ins denton era leger che la denominaziun «Langenberg», seigi inspirada dalla liunga collina (Cuolm liung). Las paucas restonzas da mirs sigl areal lain percorscher ch'ei setracta d'in stabiliment spazius. Il baghetg principal consisteva d'ina tuor el nord, d'ina pintga cuort circumdada d'in mir e d'in baghetg d'habitar cunfinont da vart meridiunala. Pli lunsch naven da quella vart existeva in casti vastus sco predustonza ch'era separaus dil baghetg principal tras in foss. Tras la specia dils rests dil mir selai concluder ch'igl edifices ei vegnius construius en la secunda mesadad dil 13avel tschentaner. Documents secrets leutier mauncan. En ina dispeta guerrila pervia da rivendicaziun da pussonza ei il stabiliment dil casti vegnius destruius tras il barun Donat da Vaz e silsunter buc vegnius reconstruius pli. Suenter la mort da Donat da Vaz (1337) ein igl onn 1342 ils dretgs dil casti e dil Segneradi da Lagenberg vegni tras sia feglia Ursula en possess da siu mariu Rudolf da Werdenberg-Sargans.



Skizza, Poeschel 1930

## **Administraziun habsburghesa**

Il casti da Lagenberg sin la collina, oz curclada d'ual, denter ils quartivers Cons e Murschetg, formava viers la fin dil temps medieval il center dil Segneradi da Laax. Quel steva sut il domini direct digl Imperi tudestg ed era la residenza dil castellan habsburghes. Il Segneradi da Laax ei vegnius erigius entuorn ils 1283 e vegnius daus per feudum alla Casa da Habsburg tras igl imperatur Rudolf. Per l'emprema gada vegnan il Contadi ed il Segneradi da Laax numnai igl onn 1300 egl urbar habsburghes dil retg Albert I. Quel era buc colligiaus cun in territori e consisteva bionz ord ina lucca corporaziun da persunas da famiglias spatitschadas lunsch per la tiara entuorn e che appartenevan al vegl contadi dalla Currezia, ils aschinumnai Libers da Laax. Il Segneradi disponeva d'ina atgna giurisdicziun e d'entradas da dazi tras la fiera. Tier il stabiliment, dil qual mo paucas restonzas ein da veser, udevan era entginas cuorts purilas che cunfinavan el sid dalla collina cul plaz cun il num Marcau. Il stabiliment dil casti ei vegnius destruius duront ina dispeta guerrila tras il barun Donat da Vaz ed ei silsuenter buc pli vegnius reconstruius. Protectur dil dretg e dalla fiera Il castellan habsburghes che resideva el casti era responsabels per la giurisdicziun e per la protecziun dalla fiera che haveva liug mintg'onn il di da s. Gagl (16 d'october). Il liug da dertgira sesanflava a «Sessafret» damaneivel da Castrisch. Alla fiera ni a marcau vegnevan marcadonts sur il Veptga (Pass Pigniu), sur il Culom Val e sul Lucmagn a Laax. Ils marcadonts da Ligiaun (Lugano) gudevan privilegis specials. Vendiu e cumprau vegneva ei biestga e cavals, teilas, calzers, sal, vin, ferramenta e da tuttas uisas rauba pli pintga. Sco ei para vegneva gia da gliez temps buc mo la veglia via sur Sagogn-Mulin-Planezzas-Tuora duvrada, mobein era la nova rutta sul Lucmagn via Laax, che menava directamein sil plaz fiera a Marcau. Per exequir lur funcziun da protecziun incassavan ils castellans amplamein ils dazis. A lur atgna segirtad surveva la ferma miraglia dil casti da Lagenberg.